

历代名臣传

历代名臣传

歷代名臣傳卷之二十八

高安朱 軾

全訂

南城張

江分纂

漳浦蔡世遠

族裔朱

齡重刊

宋

岳飛

岳飛字鵬舉相州湯陰人。世力農。父和能節食以濟饑人。飛少負氣節。沈厚寡言。家貧力學。尤好左氏春秋。孫吳兵法。生有神力。未冠。挽弓三百觔。弩八石。學射于周同。盡其

術能左右射。同死朔望。設祭于其家。父異之曰。汝他日爲時用。其狗國死義乎。宣和四年。應真定宣撫劉韜募相有劇賊陶俊。賈進和飛請百騎滅之。遣卒僞爲商入賊境。賊掠以充伍。飛乃伏百人山下。以數十騎逼賊。賊出戰。飛陽北。賊追之。伏起。先所遣卒擒俊進和以歸。康王至相。命飛招賊吉倩。倩降。補承信郎。從劉浩解東京。圍領百騎習兵。河上敵猝至。飛麾其徒曰。敵雖衆。未知吾虛實。當及其未定。擊之。乃馳迎敵。有梟將舞刀而前。飛斬之。敵大敗。遷承義郎。隸留守宗澤。犯法。將刑。澤見奇之。曰。此將材也。免之。

會金人攻汜水澤以五百騎授飛遂大敗金人而還澤謂
曰爾勇智才藝古良將不能過然好野戰非萬全計因授
以陣圖飛曰陣而後戰兵法之常運用之妙存乎一心澤
是其言高宗卽位飛上書數千言大畧謂陛下已登大寶
社稷有主勤王之師日集宜乘其怠擊之黃潛善汪伯彥
輩不能承聖意奉車駕日益南恐不足係中原之望願陛
下親率六軍北渡則將士作氣中原可復書聞以越職奪
官詣河北招討使張所所問曰汝能敵幾何飛曰勇不足
恃用兵在先定謀藥枝曳柴莫敖采樵皆謀定也所矍然

曰。君殆非行伍中人。待以國士。飛因說所曰。國家都汴。恃河北以爲固。苟馮據要衝。峙列重鎮。一城受圍。諸城或撓。或救。金人不能窺河南。則京師根本之地固矣。招討誠能提兵壓境。飛惟命是從。所大喜。借補武經郎。使從王彥渡河。至新鄉。金兵盛。彥不敢進。飛獨引所部鏖戰。奪其纛。而舞。諸軍爭奮。遂拔新鄉。飛軍食盡。從彥乞糧。彥不與。飛乃引兵益北。戰于太行山。擒金將拓跋耶烏居。數日復遇敵。飛單騎持丈八鐵槍。刺殺黑風大王。敵衆敗走。飛知彥不悅。已復歸宗澤爲留守。司統制澤卒杜充代之。飛居職二

年。每戰皆捷。嘗駐兵竹蘆渡。與敵相持。乃選精銳三百。伏前山下。令各以薪芻交縛兩束。夜半。發四端而舉之。金人疑援兵至。驚潰。賊黃善曹成孔彥舟等合兵五十萬。薄南薰門。飛部僅八百。衆懼不敵。飛曰。吾爲諸君破之。左拔弓。右運矛。橫衝其陣。賊亂。大敗之。又擒賊杜叔五孫海于東。明敗黃善于清河。授英州刺史。及杜充將走建康。飛諫曰。中原地尺寸不可棄。今一舉足。此地非我有。他日欲取之。非數十萬衆不可。充不聽。飛不得已。從而南。于道連破張用李成諸賊。及充降。金兀朮趨杭州。飛要擊至廣德。六戰。

皆捷。擒其將王權。俘簽軍首領四十餘。察可用者。結以恩。遣還。令夜斫營縱火。敵衆亂。飛擊敗之。駐軍鐘村。軍無見糧。將士忍飢不擾民。金所籍兵相謂曰。此岳爺爺軍也。爭來降附。四年。兀朮攻常州。宜興。令迎飛移屯。盜郭吉聞飛來。遁入湖。飛使王貴。傅慶追破之。因遣辨士盡降其衆。金人再攻常州。飛四戰皆捷。尾襲于鎮江東。又捷。戰于清水亭。又大捷。橫屍十五里。兀朮趨建康。飛設伏牛頭山待之。夜令百人黑衣混金營中擾之。金兵驚。自相攻擊。兀朮次龍灣。飛以騎三百。兵二千。馳至新城。大破之。兀朮奔淮西。

遂復建康。因上言建康要害之地。宜選兵固守。仍益兵戍淮。拱護腹心。帝嘉納焉。兀術歸。飛邀擊于靜安。敗之。詔討戚方。降其軍。紹興元年。張俊討李成。請飛爲副。時成黨馬進犯洪州。連營西山。飛曰。賊貪而不慮後。若以騎兵自上流。絕生米渡。出其不意。破之必矣。請自爲先鋒。俊大喜。飛重鎧躍馬。潛出賊右。突其陣。所部從之。進大敗。走筠州。飛抵城東。賊出城布陣十五里。飛設伏以紅羅爲幟。上刺岳字。選騎二百。隨幟而前。賊易其少薄之。伏發。賊敗。飛使人呼曰。不從賊者坐。吾不汝殺。坐而降者八萬餘人。進以餘

卒奔成于南康。飛夜引兵至朱家山。又斬其將趙萬。成聞進敗。自引兵十餘萬來。飛與遇于樓子莊。大破之。成走降。偽齊賊張用者亦相人。寇江西。飛以書諭之曰。吾與汝同里。南薰門鐵路步之戰。皆汝所悉。今吾在此。欲戰則出。不戰則降。用得書曰。果吾父也。遂降。江淮悉平。飛功第一。二年。賊曹成擁衆十餘萬。據道賀二州。命飛招之。成聞飛將至。驚曰。岳家軍來矣。卽分道遁。飛至茶陵。招成。成不從。飛上言。比年多命招安。故盜強則肆暴。屈則就招。苟不畧加勦除。蠭起之衆。未可遽殄。許之。飛入賀州境。得諜縛之。帳

下。飛出帳調兵食。吏曰糧盡矣。奈何。飛曰姑反茶陵已而顧謀者若失意狀頓足而入。陰令逸之。謀者既去。飛卽蓐食潛趨遶嶺。未明已至太平場。麾兵掩擊。賊大潰。成走據北藏嶺。上梧關。遣其黨迎戰。飛不陣而鼓。奪其二隘。成又以衆十餘萬守蓬頭嶺。飛部纔八千。一鼓登嶺。破其衆。成奔連州。飛謂張憲等曰。成黨散去。追而殺之。則脅從可憫。縱之則復聚爲盜。今遣若等誅其魁而撫其衆。慎勿妄殺。累主上保民之仁。于是憲等分道招降二萬人。與飛會連州。進兵追成。成走宜撫司。降時以盛夏行師瘴地。撫循有

方士無一人病者。嶺表平。移屯江州。甫入境。承檄捕劇賊數部。皆平之。三年。虔吉盜合衆寇掠閩廣。帝命飛討之。飛至虔。賊彭友迎戰。躍馬馳突。飛麾兵卽馬上擒之。餘黨退保固石洞。洞高峻。環水止一徑可入。飛列騎山下。皆持滿。黎明遣死士疾馳登山。賊衆亂棄山而下。騎兵圍之。賊呼丐命。飛令勿殺。受其降。復授徐慶等方畧。悉破降諸郡餘賊。初。帝以隆祐震驚之故。密令屠虔。飛請誅首惡。赦脅從。不許。請至三四帝爲曲赦虔人。虔人感其德。祠之。秋入覲。帝手書精忠岳飛字。製旗賜之。授鎮南軍承宣使。江南西

路沿江制置使李山吳全吳錫李橫牛臯皆隸焉。及僞齊遣李成挾金人入侵破襄陽唐鄧隨郢諸州。及信陽軍湖寇楊么又與僞齊通欲順流而下。李成亦欲自江西趨兩浙與么會。四年遂除飛兼荆南鄂岳州制置使使爲之備。飛奏襄陽六郡爲恢復中原基本。今當先取六郡除心膂之病然後加兵湖湘以殄羣盜。帝以問趙鼎。鼎曰知上流利害無如飛者。遂授黃復州漢陽軍德安府制置使飛渡江。中流顧幕屬曰飛不擒賊不涉此江矣。兵抵郢州僞將京超號萬人敵乘城拒飛。飛鼓衆而登超投崖死復郢州。

俄復隨州。進趣襄陽。李成迎戰。飛見成陣。笑曰。步兵利險阻。騎兵利平曠。成左列騎江岸。右列步平地。雖衆百萬。何能爲。舉鞭指王貴曰。爾以長槍步卒擊其騎兵。指牛臯曰。爾以騎兵擊其步卒。合戰。馬應槍斃。後騎皆擁入江。步卒死者無數。成夜遁。遂復襄陽。又進復鄧州。唐州及信陽軍。襄漢悉平。帝聞喜曰。朕素聞飛行軍有紀律。未知能破敵如此。乃以隨郢唐鄧信陽並爲襄陽府路。以隸飛。授飛清遠軍節度使。湖北路荆襄潭州制置使。封武昌縣開國子。移屯鄂。飛上言。金人所愛。惟子女金帛。志已驕惰。劉豫僭

偽人心終不忘宋如以精兵二十萬直擣中原恢復故疆
誠易爲力。襄陽隨郢地皆膏腴苟行營田其利必厚。臣候
糧足卽過江北勦戮敵兵。又言六郡人戶闕牛糧乞量給
官錢免官私逋負。州縣官以招集流亡爲殿最時方重深
入之舉而營田之議自此始。元末劉豫合兵圍廬州帝命
飛解圍。飛至廬張岳字旗與精忠旗一戰而金兵潰。五年
入覲封武昌郡開國侯命招捕楊公飛所部皆西北人未
習水戰。飛曰兵何常顧用之何如耳。乃先遣使招之。賊將
黃佐曰岳節使號令如山若與之敵萬無生理不如降飛。

表佐武義大夫。單騎按其部。拊佐背曰。子知逆順者。果能立功。封侯豈足道。欲復遣子至湖中。視可乘者。擒之。可勸者。招之。如何。佐感泣。誓以死報。佐襲周倫砦。殺倫。擒其統制陳貴等。飛上其功。遷武功大夫。時張浚以都督軍事至潭。將還防秋。飛袖小圖示浚曰。已有定畫。都督能少留。八日可破賊。浚曰。何言之易。飛曰。王四廂以王師攻水寇。則難。飛以水寇攻水寇。則易。水戰我短彼長。以所短攻所長。所以難。若因敵將。用敵兵。奪其手足之助。離其腹心之託。而後以王師乘之。八日之內。當俘諸酋。浚許之。飛遂如鼎

州黃佐招楊欽來降。飛喜曰：「楊欽驍悍，旣降，賊腹心潰矣。」表欽武義大夫，禮遇甚厚。復遣歸湖中。兩日，欽說余端劉詵等來降。飛詭罵欽曰：「賊不盡降，何來也？」杖之，復令入湖。是夜掩賊營，降其衆數萬。公負固不服，方浮舟湖中，以輪激水，其行如飛。旁置撞竿，官舟迎之輒碎。飛伐君山木爲巨筏，塞諸港汊，又以腐木亂草浮上流而下，擇水淺處遣善罵者挑之。且行且罵，賊怒來追，則草木壅積，舟輪礙不行。飛擊之，賊奔港中，爲筏所拒。官軍乘筏，張牛革以蔽矢石，舉巨木撞其舟，盡壞。公投水，牛臯擒斬之。飛入賊壘。